

GUITS NE PXEEL PABL LO

TIT

1 ¡Diuzh Tit!

Naa nac Pabl, tib ngundziin win nac naa lo Dios, tib zha ne pxeel Jesús nonee Xtiidz Ndzon me lo miech. Laa naa none xtiidz me, zeena grëse miech ne bzooblöle Dios, gliladz zho me, gacnan zho zhapaa nac wseed ne zional ne (wseed ne rnee zha none gbannie miech Dios), ²wseed ne rlu ganle ible laa ne quiambiaaz ygaa ne tib guielmban ne gdzindraa dze lozh. Ansraa ne tsaa guidzliu, laa Dios bzeetle ne laa me gneedz guielmban co, ni mesi gon led yed me rquidie. ³Ni niina ne laa dze co bdzin, laa me blu lo ne ganle zha nac xtiidz me, mincopaa nagon bzo me naa none naa lo miech. Lëe me ga nac Dios ne psilaa ne lo dol.

⁴Laa naa rxel guits rii lo luu gon Tit. Rzaac naa luu zig tib xpëed naa, sac nan naa nli dib zdoo luu rliladz luu Dios zigne rliladz naa me.

Rnab naa lo Dios men ne nac Pxoze ne, ni lo Jesús men ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

⁵Rsoladzaxe luu ganle, zeene psan naa luu lo guidzliu win ne lë Cret i, laa naa psan luu zeena lozh gun luu grëraa dziin ne no gac i, ni psan naa diidz lo luu zha gzo luu zha ne so gnabey lo grë zha ne rliladz Jesús, tib tib guiedz qui. ⁶Bien sca, zeene gzo luu zha co, ga rquiin:

tib zha ne zaacse mban, zeena peet glisquid miech lo zho;

tibaque wnaa ne mbannie zho, men ne nacse tsieel zho,

zaacse quiachoob zho xpëed zho, rliladz mëed Dios (zëëbd diidz pe guielntseeb ne noyun mëed, o rondgaa mëed diidz).

⁷Sac zha ne sca so lo grë zha ne no xnëz Dios, ib none gac zho tib zha ne ndzinli mban, sac gon xtsiin Dios ga gun zho. Nodne gac zho:

zha nlëëguic,

zha ngonziu,

zha nad ron diidz,

zha nguibdil,

zha ne rzonal dimi.

⁸Sinque none gac zho tib zha ne:

ndzinli nac guic,
 ine niowse rdeed zho zaatne rbëz miech ne rdzinta lidz zho,
 rioxco zho run zho niapse ncuaañe rquiin lo samiech zho,
 zienal zho gac niapse miñe nac diidzli,
 rioxco zho run zho niapse miñe rnabey Dios,
 rrielo zho rnabey zho guic zho, rnabey zho xcuerp zho.

⁹Ni none tibaque tsienal zho miñe nac Xtiidz Jesús, miñe pseed zho; zeña guien zho zha gnee zhow lo grë zha ne gard tsoguc zha naca, ni grieelo zho glu zho lo grë zha ne rlëënie Xtiidz Jesús, guien zha co nonguielda ga glëënie zhow. ¹⁰Sac no ndal grë zha ne nëd gon Xtiidz Jesús niina, ncuaañe paat rquiind rseed zho miech, rquidie zho; ni lëëpaa zha ne sca run nac zha Israel. ¹¹Gacxe waa, ib none guioog ro zho; sac gon par cueexlëse zho dimi no zho noseed zho miech grë ncuaañe paat rquiind; zaatne no tib yu miech, grëse zho rquidie zho.

Bien sca gon nsin bzo lo grë zha Cret i. Sac gon, ¹²tib menladzaque zho, tib men rac lo zho bzeet ganle zha nac zho zeene znu bnee me: “Nandraaque zha Cret, loxaque noquidielsa zho samiech zho. Masaque mban zho zigne mban grë ma ntseeb ne no guix; loxaque gowse zho zienie guic zho, rbech zho gun zho dziin.” ¹³Ni nligaa sca nac zho. Gacxe waa, bien gdziguiend luu grë miñe run zho, goctox lo zho zeña sodziits zho lo Xtiidz Ndzon Jesús miñe no gliladz zho. ¹⁴Bnee lo zho yquiaadiagdraa zho beelze pe grë godiidz ne rbeebeey zha Israel, ni niicle yquiaadiagdga zho grë miñe rnabey zha ne rlëënie Xtiidz Ndzon Jesús.

¹⁵Golgan ganle, grë miech ne ndzinli nac guic, zha ne mbe xquielrien, ncuaañe notaa, mbe naca lo zho; sangue zha ne rililadz Xtiidz Dios, zha ne ndzinlid nac guic, tsod tib ncuaañe mbe glulo lo zho; sac desde zdoo zho, desde xquielrien zho mbed. ¹⁶Rnee zho runbey zho Dios, per rlu nlida sac ndzinlid mban zho. Zha yozha, xquielndaan yozh zho zienie zho, led zha ne guiabd ne gun ncuaañe yquiina.

Znu nac Xtiidz Ndzon Jesús

2 Sangue luu gon, none gnee luu lo grë miech qui zigne nacse Xtiidz Jesús.

²Grë men bgui ne nac zha gol lo to i, bnee lo zho:

tibililadz gac zho,
 gund zho ncuaañe cuee xquielto zho,
 quix zho biini, ncuaañe ndzinli tsienal zho gun zho;
 tiblifique gac zho lo Xtiidz Jesús,
 gleynie zho samiech zho, ni
 dziits so zho tel pe nactaa grë guielnë ne noyan zho.

³Scaquegaa grë men wnaa ne nac zhagol, bnee lo zho:

gban zho zigne no gban zha ne nole xnëz Dios,
 gzhixcuad zho diidzguizh,
 gzudzd zho.

None zaacse gac zho, ⁴zeena zha glu lo grë wnaa nguieg zha gban zho. Cseed zho grë wnaa nguieg:

gan zho tsieel zho,

gan zho xpëed zho,

⁵gac zho tib wnaa nix biini,

quitnied zho tsieel zho;

zaacse gun zho xtsiin zho,

niowse gac zho, niowse gnee zho,

gon zho xtiidz tsieel zho; zeena tsod pe nacne gneenë miech Xtiidz

Dios.

⁶Ni scaquegaa bnee lo grë zha bgui nguieg, gac zho zha nix biini. ⁷Luuzhal zaacse been grëse ncuaañe no gun luu, zeena ga gwi zho ganle zha none gban zho. Zeene cseed luu zho, ine tibiladz goc, gund luu ne quitnie luu zho.

⁸Bguib diidz ne gnee luu, zeena choot peet glisquid lo luu; ni scagaa, grë zha ne rlëenie Xtiidz Jesús, stoladz zho zeene gan zho guiend pe glisqui zho lo ne.

⁹Grë zha ne lega run xtsiin ben, pso diidz lo zho gon zho xtiidz men ne quia zho xtsiin, niowse gac zho, niowse gnee zho, yquiabrod zho lo me. ¹⁰Ib cuand zho, sinque ine ti miech mbe lo gac zho; zeena ga gan miech ganle zha niowtaa nac lo xquielmban zha ne zienal Xtiidz Dios, men ne psilaa ne lo dol. ¹¹Grë diidz rii nagon pso lo zho.

Gotsaa gwi ne ganle zha noxcotaa Dios miech, gacxe psilaa me ne lo dol waa; ¹²sac laa me racladz csaan ne grëse guieintseeb, csaan ne grëtaa ncuaañe rleynie zha ne nod xnëz me, guien ne ndzinli gban ne, tibaque gwi ne dien pa min wen, pa mingaa wend, ine dzioxco ne gban ne zigne racladz me.

¹³None sca ndzinli gban ne, haxta dzianlo ne gdziñ dze ne laa Jesús guiaad stib, zigne psanle Dios diidz; gal dze co, laa me guiaad con grë xquielndzon me. Me nac Dios ro ne riladz ne, me psilaa ne lo dol. ¹⁴Sac gon, me bgaadz guielgut ne niogual ne, me bdiizh grëtaa guieintseeb ne bdziuun ne, psanmbe me ne lo grëtaa ncuaañe bdziuun ne; gane niina, lo me ngab ne, ni none dzioxco ne gban ne zigne rnabey me.

¹⁵Grë min rii nagon pseed grë miech qui, bnee lo zho gban zhow. Zeene riegala gdzieebd luu goctox lo zho, sac gon luu riegual gnee lo zho. ¡Sca been, zeena choot quitnied luu!

Znu riegual gban zha ne no xnëz Dios

3 Beencsoladz zho ganle none gon zho mine rnee grë zha ne nac wxtis, gac zho tib zha nguzobdiidz, ni ib soliaadzd zho gun zho grë tel pe ncuaañe yquuin lo samiech zho. ²Guien zho gneenëd zho samiech zho, ine zaacse gbannie zho samiech zho, niowse gac zho, niowse gnee zho, ni zeene cho lo gnee zho none ndooladz gac zho, ndooladz gnee zho.

³Sac gon haxta ne, ib peet riend ne glo, ntseeb goc ne, bdiits ne grë mine rnabey Dios; laa ne ziole nëz ne nitlo ne hor co, masaque bgadoo ne lo grëtaa ncuaañe racladz xcuerp ne, lo grëtaa ncuaañe ndzinlid ne bley ne bdziuun

ne. Niapse guiełntseeb bional ne, nē rac zdoe ne rdziañ ne ncuaane quanie, ncuaane run stib miech; zigtaa row rzhiizh zdoe zho gon zho ne, scaque ne, zha ne rdziañtaa ne, row rzhiizh zdoe ne bdziañ ne zho. ⁴Per bdziñ dze, zeene laa Dios (men ne psilaa ne lo dol) blu ganle pa lotaa nac xquielwen me, pa lotaa nquialadz me miech, ⁵laa me psilaa ne; per guiabd ne togo por pe ncuaane wen ne bdziun new, sinque porne pquia zdoe me new. Zeene psanbe me ne lo grētaa xtol ne, rreequia gol ne ga stib, ni bzhixcuaa Espiritu Sant lo xquielmban ne.

⁶Niapse por Jesús men ne psilaa ne ga, laa Dios pxeel Espiritu Sant rneedz me grēse guiełbiini ne rquiin lo ne. ⁷Por mine been Jesús ni mine been Espiritu Sant laa ne biaanwen lo Dios; ni porne noxco me ne gane bnabey me sca goca. Gane niina, ndion ne ib zгаа ne tib guiełmban ne gdziñd dze lozh, sac ib sca nac xtiidz me.

⁸Mine rne naa lo luu nu, diidzliw. Racladz naa tibaque gnee luuw lo grē zha qui, zeena grēse zho ne nac zho zha ne rliladz Dios, tsoxco zho gun zho niapse grē ncuaane ndzinli; sac gon, min co nac mine nonguiel, ni mincogaa rquiin lo grēse miech.

⁹Biche lo zha ne racladz tildiidznie luu grē ncuaan paat rquiind, zig nac grē godiidz dien pe been grē mengol padzeela, dien pe nonguiel tsienal ne ley, te nonguielda ye. Ncuaane paat rquiind ga, loxaque runctila miech; ni lalnu rieguiald gaquieta.

¹⁰Teł cho zha ne rsilo rgodil grē zha ne rliladz Dios, blisquiw lo zho. Bnee lo zho tib, tel gan luu rond zhow, bnee lo zho stib; telne rondaque zhow, dzigo bzonēz zho gan zho dien pa nēz tsie zho. ¹¹Zha ne sca run, gase rlu ne zieniedraa guic zho gon zho mine rnabey Dios; sac nanpaa zho dol ga, ni laa zho runa.

¹²Laa naa no cxel tib zha ne guiaad i, yase cxel naa Artem o cxeelgaa naa Tic. Zeene glanso zho i, sigiueel luu guiaad luu Nicópolis ga gdzieel ne; sac ib ga ni naa cuēz naa len mēē nal ne ziaad nu. ¹³Laga no luu i, bioxco zaatne grielotaaw been xyudar Apol grop me licenciad Zenas. Bdeed grē tel pe ncuaane yquiin zho nēz; zeena peet gunfalte lo zho, grielo gdziñ zho zaatne no tsie zho. ¹⁴Grēse zha ne nacgrē ne ne rliladz ne Jesús, none cseed zho gun zho xyudar zha ne no liaadz; glu zho ganle rquiin zho, led zhlēd mban zho.

¹⁵Grēse zha ne no lo naa nu, laa zho rxeel bdiuzh lo luu i. Bzhiguiel bdeed tib zhibdiuzh no lo grēse zha ne rleynie no i; sac ye zho rliladz Jesús.

Guiaanne Dios to sca dien. Peet tsienied guic to, me gacnieñ to; sac gon me noxco grēse zhizhgab to. *Pabl*